



Komunikado di prensa

17 di febrüari 2025

Cft: "Tin peliger di rekaida na Boneiru, mester pone e base na òrdu"

Kralendijk – Durante e deliberashonnan ku a tene ku Kolegio Ehekutivo i Konseho Insular di Boneiru, Kolegio di supervishon finansiero di Boneiru, Sint Eustatius i Saba (Cft) a pidi atenshon pa e problemanan ku frekuentemente ta keda reflehá den e hayasgonan di Cft. Maneho finansiero, e polítika presupuestario i e funshonamentu di e entidatnan gubernamental ta kore peliger di rekaida, pa motibu di un falta di kapasidat di implementashon. Boneiru simplemente no ta *in control*.

Kapasidat di implementashon

Den tur e áreanan, Cft ta konstatá un falta di kapasidat di implementashon, loke ta varia di un falta di tumamentu di desishon pa e gobernashon insular te un falta di implementashon di esaki. Esaki ta keda reflehá den e rekaida di maneho finansiero, implementashon deficiente di maneho i funshonamentu insuficiente di entidatnan gubernamental.

Maneho finansiero

Den e añanan pasá, Boneiru a tuma pasonan importante pa mehorá maneho finansiero. Pa 2023, pa di dos biaha konsekutibo, Boneiru a risibí un deklarashon kompletamente aprobatorio di ouditor. Sinembargo, tin un rekaida. E aña pasá, Cft a ekspresá su mes di manera kítiko den su konsehonan, i a sinti e obligashon pa apstené di emití huisio tokante di e di kuater informe di implementashon di 2024, pa motibu di e suministro deficiente di informashon. Di e manera aki, ta limitá Konseho Insular den su tarea di supervishon. Konsiderando e hayasgonan aki, Kolegio Ehekutivo a invitá Cft pa - riba término kòrtiku - duna konsehonan mas detayá tokante di e strukturashon di maneho finansiero.

Implementashon presupuestario 2024 i konsekuensianan pa 2025

Cft a reiterá su preokupashonnan tokante di e faktibilidat di e ambishonnan presupuestario di Boneiru, i ta opservá un desaroyo preokupante respekto di rekursionan no gastá. Den un plaso di 5 aña, e presupuesto di Boneiru a ser redoblá, meskos ku e reservanan. E isla tin difikultat pa gasta e rekursionan, i tin hopi sèn di parker den reservanan aloká. Debí na esaki, ta aplasá pa añanan posterior e ambishonnan polítiko di 2024.

Entidatnan gubernamental

Cft tambe a pidi atenshon pa *corporate governance* i e maneho di e entidatnan gubernamental. E funshonamentu di Selibon ta demostrá e urgensia di atendé ku e puntonan aki mas pronto posibel.

Kobro di impuestonan lokal

Finalmente, Cft a reiterá su opheshonnan kontra e intenshon di Boneiru pa tuma over e kobro di impuestonan lokal di Belastingdienst Caribisch Nederland. Esaki ta krea riesgonan konsiderabel pa e presupuesto di Boneiru. E organisashon administrativo ya kaba ta bou di preshon debí na e retonan den e área di implementashon di polítika, maneho finansiero i entidatnan gubernamental. Komo reashon, Kolegio Ehekutivo a indiká ku e lo laga den tur kaso e funshon di lokèt di e servisio di impuesto serka Belastingdienst Caribisch Nederland. Ademas, Boneiru lo priorisá pone na òrdu e atministrashon básiko di impuestonan.



[Fin di komunikado di prensa]

Potrèt:

Ton Vekuijlen

Deskripsjon di potrèt:

Boneiru simplemente no ta *in control*.

Nota pa e redakshon - no publiká

Persona di kontakto di Cft:

Sekretariado di Kolegionan di supervishon finansiero

Telefòn +5999 461-9081 / +5999 461-9082 / +5999 461-9084

Koreo elektróniko info@cft.cw

Wèpsait www.cft.cw

Kontaktonan di prensa:

Jefka Alberto

Telefòn +5999 512-6861